

Uhusiano na Mchungaji Mkuu

Maana sisi tu wafanya kazi pamoja na Mungu.—1 Wakorintho 3:9.

Uhusiano wa lazima na mchungaji mkuu utawafanya wachungaji walio chini Yake kuwa wawakilishi hai wa Yesu, nuru ya kweli kwa ulimwengu. Uelewa wa vipengele vyote vya imani yetu ni muhimu, lakini bado ni muhimu zaidi kwamba mchungaji atakaswe kupitia ukweli anaouwasilisha.

Mtendakazi anayejua maana ya muungano na Yesu, anayo shauku inayokua daima na uwezo wa kung'amua maana ya huduma kwa Mungu. Maarifa yake yanaongezeka: kwa maana kukua katika neema kunamaanisha kuwa na uwezo unaokua kwenye uelewa wa Maandiko. Mtu wa namna hiyo ni mtendakazi wa kweli pamoja na Mungu. Anatambua kwamba yeye ni chombo tu, na kwamba analazimika kukaa tu katika mikono ya Bwana. Majaribu yanamjia; kwa maana asipojaribiwa hivyo, hawezi kamwe kujua ukosefu wake wa hekima na uzoefu. Lakini kama akimtafuta Bwana kwa unyenyekevu na imani, kila jaribu litafanya kazi kwa manufaa yake. Wakati fulani anaweza akaonekana kushindwa, lakini kinachoonekana kama kushindwa kwake kinaweza kuwa njia ya Mungu ya kumletea maendeleo ya kweli, na inaweza kumaanisha kumletea ujuzi bora zaidi juu yake mwenyewe na imani thabiti zaidi kwa Mbingu. Anaweza kuwa bado anafanya makosa, lakini anajifunza kutorudia makosa haya. Anakuwa imara ili kuupinga uovu, na wengine wanapata faida kutokana na kielelezo chake....

Wale ambao wana uzoefu wa kina kabisa katika mambo ya Mungu ndio walio mbali zaidi na kiburi na kujiinua. Kwa sababu wana uelewa wa juu wa utukufu wa Mungu, wanahisi kwamba nafasi ya chini kabisa katika utumishi Wake ni yenye heshima sana kwao.

Musa aliposhuka kutoka mlimani baada ya siku 40 alizotumia katika mazungumzo na Mungu, hakujua kwamba uso wake uling'aa kwa mng'ao ambao uliwatisha wale waliokuwa wanauona.

Paulo alikuwa na maoni ya unyenyekevu juu ya ukuaji wake katika maisha ya Kikristo. Anajizungumzia yeye mwenyewe kuwa mwenye dhambi mkuu. Tena anasema, "Si kwamba nimekwisha kufika, au nimekwisha kuwa mkamilifu" (Wafilipi 3:12). Japokuwa Paulo alikuwa anaheshimishwa sana na Bwana.

Mwokozi wetu alimtangaza Yohana Mbatizaji kuwa mkuu kabisa miongoni mwa manabii; lakini alipoulizwa ikiwa yeye alikuwa ni Kristo, Yohana alijitangaza kuwa asiyestahili hata kufungua Kamba za viatu vya Bwana wake. Wanafunzi wake walipokuja na malalamiko kwamba watu wote walikuwa wakimgeukia mwalimu mpya, Yohana aliwakumbusha kwamba yeye alikuwa tu mtangulizi wa Yule Ajaye.

Watendakazi wenye roho hii wanahitajika leo.... Bwana wetu anawaita wafanya kazi, ambao wakihihi hitaji lao la damu ya Yesu ipatanishayo, wanaingia katika kazi yao ... wakiwa na uthibitisho kamili wa imani, wakitambua kwamba siku zote watahitaji msaada wa Yesu ili wajue namna ya kushughulika na watu

(*Gospel Workers*, 142, 143).